

Visoki predstavnik najavio daljnje aktivnosti u borbi protiv kriminala

Visoki predstavnik Paddy Ashdown jutros je potpisao administrativne odluke kojima se zamrzavaju svi bankovni računi u Bosni i Hercegovini za 14 osoba koja pomažu optuženim ratnim zločincima da izbjegnu uhićenje. Te su osobe sljedeće:

- Aleksandar KARADŽIĆ
- Luka KARADŽIĆ
- Sonja KARADŽIĆ-JOVIČEVIĆ
- Ljiljana ZELEN-KARADŽIĆ
- Đojo ARSENOVIĆ
- Zvonko BAJAGIĆ
- Bogdan SUBOTIĆ
- Žarko NIKOLIĆ
- Jovan ĐOGO
- Slavko ROGULJIĆ
- Dragan LALOVIĆ
- Dragan SPASOJEVIĆ
- Milenko VRAČAR
- Dragomir VASIĆ

OHR je jutros o ovim Odlukama izvijestio banke i bh. bankarska tijela koji će prema važećim bankarskim zakonima provesti ove Odluke.

Visoki predstavnik je jutros također donio odluku kojom smjenjuje Đoju Arsenovića i Dragomira Vasića s mjesta poslanika u Narodnoj skupštini Republike Srpske. Dragomir Vasić je također smijenjen sa svoje pozicije u Skupštini opštine Zvornik.

Na konferenciji za tisak, koja je danas održana u Sarajevu, Visoki predstavnik je rekao da je ovo još jedan korak koji je

poduzela "koalicija za borbu protiv zločina". "Ovu koaliciju čini šest saveznika: Američka administracija, sa izvršnim naredbama Predsjednika; Europska unija sa zabranom ulaza; OHR sa bonskim ovlastima; SFOR, Međunarodni krivični sud u Hagu (ICTY) i, konačno, naši lokalni partneri u regiji" rekao je Visoki predstavnik. Naglasio je "članovi koalicije imaju različito oružje koje koristimo na različite načine u različito vrijeme, ali svi imamo jedan, koordinirani cilj, a to je iskorijeniti kriminalne elemente u Bosni i Hercegovini."

Visoki predstavnik je kazao da je slučaj Slobodana Miloševića pokazao da su ove tehnike uspješne u razbijanju mreža koje omogućavaju optuženim ratnim zločincima da ostanu na slobodi.

Današnje odluke jasno pokazuju da je međunarodna zajednica odlučna pojačati pritisak dok svi oni koje je ICTY optužio za ratne zločine ne budu izvedeni pred lice pravde. Visoki predstavnik je danas konstatirao da se "prije nekoliko dana, Željko Meakić, kojeg je optužio ICTY, sam predao srbijanskim vlastima da bi ga isporučili u Hag. Meakić je pokazao put koji bi ostali trebali slijediti – jer sve dok se sami ne predaju, ili ne budu uhićeni, ovi spiskovi će samo postajati duži."